
ЎЗА: Фарғона шаҳар ҳокимлиги: бозордаги нарх наво асосли эмас

“Uza.uz” сайтида Ўзбекистон истеъмолчилар ҳуқуқларини ҳимоя қилиш жамиятлари федерациясининг мамлакат бозорларидаги нарх-наволарни ўрганиш натижалари юзасидан “Ўзбекистон бозорларида мол ва товук гўшти қимматлашди(ми?)” номли хабарда мамлакат бозорларидаги озиқ-овқат, ноозик овқат ва қишлоқ хўжалиги маҳсулотларининг 2019 йил 17 февраль ҳолатидаги нархлари тўғрисида маълумот берилган.

Фарғона шаҳар Марказий деҳқон бозорида мол гўшти нархи 36-40 минг сўм, қўй гўшти 34-40 минг, товук гўшти 18-20 минг сўмдан сотилаётганлиги кўрсатиб ўтилган. Фарғона шаҳар ҳокимлиги бунга ўз муносабатини билдирди. Шаҳар ҳокими Ҳ.Ҳабибиддинов имзоси билан келган хат таҳрирсиз эълон қилинмоқда.

"Ушбу мақоладаги кўрсатиб ўтилган ҳолатлар шаҳар ҳокимлиги томонидан ўрганиб чиқилди. Унда берилган маълумотлар ўз тасдиғини топмади.

Фарғона шаҳар ҳудудидаги деҳқон бозорларда нарх-наволарни барқарорлигини сақлаш аҳолини арзон ва сифатли озиқ-овқат ва қишлоқ хўжалиги маҳсулотлари билан ишончли таъминлаш, асосий турдаги қишлоқ хўжалиги маҳсулотлари нархларини барқарор сақланишини, нархларнинг асоссиз ошиб кетишини олдини олиш, санитария ҳолатини яхшилаш, аниқланган камчиликларни бартараф этиш мақсадида “Шаҳар махсус штаби” тузилган бўлиб, мунтазам фаолият олиб бормоқда.

Шунингдек, “Нуроний” жамғармаси ва “Маҳалла” жамоат фонди ва бошқа жамоатчилик ташкилотлари фаолларидан иборат “Жамоатчилик назорати” гуруҳларининг фаолияти янада кучайтирилган ва қўшимча гуруҳлар ташкил этилиб, деҳқон бозорларидаги маҳсулотлар турлари, ҳажмлари ва сифати, нарх-наволарнинг барқарорлиги, тозалик, савдо маданияти, харидорлар ва савдо қилувчилар учун яратилган шароитлар мунтазам ўрганилмоқда.

Бугунги кунда бозорларда асосий турдаги қишлоқ хўжалик маҳсулотлари – мол гўшти 30-36 минг сўм, қўй гўшти 34-40 минг сўм, товук гўшти 14-17 минг сўм, тухум 400-550 сўм, картошка 1500-2000 сўм, пиёз 600-1000 сўм, сабзи 1200-1500 сўм ва мевалар 1000-10000 сўмдан сотилиши таъминланмоқда.

Шу сабабли Сиздан, ушбу мақола юзасидан раддия моқола эълон қилишингизни сўрайман.

Фарғона шаҳар ҳокимлиги оммавий ахборот воситасида берилган ҳар қандай холис, ишончли, ҳақиқатга асосланган хабар ёки мақолани эътиборсиз қолдирмайди".

2019-02-24 21:05:38